

條

麓

堂

集

條麓堂集卷之四

冊文

擬上孝恪皇太后尊謚冊文

臣聞功施于代者必享美報德配于天者貴有隆名故
春秋垂于貴之文孝經明資父之愛天經地義曰惟至
情帝制皇猷具存成憲是上綦隆之號用伸罔極之思
恭惟皇妣淑慎惠溫幽閑貞靜方祗奠厚承璇蓋以資
生素魄涵精竝羲璧而朗耀柔明初進儉遜為先蘋蘩
遵助祭之儀笄纁謹問安之節小心翼翼慮善而行至
性溫溫含章不發四教備美六宮懷仁茂實騰中英聲

蜚外雞鳴進善正始於國風閔睢思賢助成夫王化言
著箴誠行存楷模名器尚虛於椒宮暉彩忽韜於桂殿
風木不待環珮無聞臣仰體餘庥服膺明訓猥以冲昧
獲奉宗桃追念劬勞靡及尊養賜衣有篋悵線縷之徒
存繫鏡無塵憶音容而不見宸光永閔慈旨弗諼漢儀
未正於長秋唐慕特深於慶善爰舉哀榮之典少酬顧
復之恩廼命禮官敬循古制考言於衆稽謀自天正位
定名具禕榆之盛禮節惠尊德備廟祔之嘉稱謹奉冊
寶上尊謚曰孝怡淵純慈懿恭順贊天開聖皇太后伏
惟明靈降格俯鑒精誠昭受鴻名永綏孝享九京匪遠

依廟貌以歆榮萬載如存蒞樽彝而受祉相我烈祖祐於嗣人俾子子孫孫裸獻無極謹言

序文

恭擬世宗實錄序文

我皇祖世宗肅皇帝御曆凡四十有五年視我祖宗列聖享國最久豐功偉績炳耀鏗鉤充滿天地不可殫述自我穆考初禋即命儒臣纂修實錄緒業未竟至于冲人嗣大歷服又五年始克成之蓋其紀載之不易如此昔周成王幼而踐祚其君臣相詔戒亦惟曰單文祖德曰成成文王功不怠于時沐浴膏澤海內安瀾而惓惓

思艱茲患雅頌作焉此周家所以為有道之長也洪惟
我皇祖躬秉聖資出撫興運刻姦剔蠹丕舉王綱立極
建中肇修人紀凡諸大政令之因革大典禮之制作咸
稽謀于天會通今古經畫自心毅然獨斷一洗俗吏牽
迹經生守文之陋執之不疑用能廓清垢氛興建廢墜
五禮式叙百度惟貞群工奔走以受成萬姓傾心而嚮
化卒之幽明協順中外赦寧聲教暨于交南威靈膺于
窮朔蓋舉我太祖成祖丕造之光烈而覲揚之巍巍乎
盛矣臨御滋久雖垂衣深拱而宵旰幾康之儆不忘于
心諸邊奏報臣下建言手批立決無滯畧刻萬幾稍暇

則又繙經史問農桑即文王日昃不遑何以加焉蓋嘗
勃幽風無逸於亭召對群臣於便殿於西苑諄諄以天
戒人窮為慮而重念宮生內長之主宰安游娛忘其先
烈朕三復仰止未嘗不流涕也深惟眇眇之身早承鴻
業未燭理道仰藉我皇祖憂勤所詒數年以來時和人
康邊圉寧泰災沴盜賊之憂不作紹庭雖遠餘澤未衰
其敢忘所自乎蓋文王之後有武王纘緒而受命日淺
至于成王始克追揚盛美紀于竹書顧朕雖德弗類而
所乘之時與地亦有不得而辭者用以史臣所輯實錄
五百六十六卷實訓二十四卷敬薦祖廟并告成事于

皇考以上慰二后在天之靈附于周家詠歌勤苦慎始
慎終之義乃若體裁義例一遵累朝舊章茲不復贅云
謹序

恭擬世宗寶訓序文

朕聞我皇祖肅皇帝在位時侍臣有請纂輯聖訓名之
曰嘉靖政要者我皇祖謙讓未遑且曰他日朕身後史
臣必書之嗚呼逝矣神衷其俟諸後者晰也茲者恭修
寶錄成一代中興大烈已可概見朕仍命儒臣就中掇
其睿謨偉製便於誦法遵舊例為寶訓二十四卷親加
裁覽蓋不勝仰止之思焉嘗觀前代人主訓辭可傳者

無幾且往往出臣下擬撰惟我皇祖淋漓灑翰頃刻千
百言累牘連篇咸抒心所自得無假思構以之議禮議
獄經國籌邊惟所施用直與執中精一之學相為表裏
其微詞奧義有前聖未發六籍未備者信定保之鴻謨
作則之明訓也朕生也晚不獲面承燕翼之謀然聆其
緒言邇其遺範豈惟文章功業燦然具陳即精神心術
之微亦有可仰窺萬一者蓋我皇祖英資大畧本出于
性生而典學崇儒又乾乾無一息之怠用能中天地為
網常禮樂之主不偶然也夫三代有道之長其本在德
澤其具在法度而救偏補弊隨時低昂則存乎人焉我

國家祖宗德澤在人二百年如一日顧法久而玩吏緣
為奸惟皇祖撥時之宜乾綱獨斷故是編所載大要在
綜名實飭修攘以興周官之法度而闢睢鱗趾之意未
嘗不存乎其中誠仁義竝用長久之道已朕屬承聖統
深懼弗克負荷以忝先烈惟是揚謨纂訓傳之無窮使
繼今萬世子孫益知祖宗德澤之所由延法度之所以
守紹庭敬止日慎一日此則余小子一念覲揚之思亦
我皇祖惓惓以繼述望後人之意也是為序

詔

擬上孝恪皇太后尊謚詔

隆慶元年

朕惟孝大尊親禮不忘本自古聖帝明王暨我祖宗列
聖膺圖續祚莫不致隆所生彝典昭垂朕心尤切恭惟
皇妣含秀坤靈生知陰教輔翼皇考婦順明章肅淑儀
以修四德體柔範而弘六義篤慶蕃祉施及眇躬陰鞠
育之深恩廣啓迪之明訓獲以冲昧寅奉宗祧思勉理
于化機冀不墜于慈命顧瞻霜露湘南之駕已遐眷念
晨昏東朝之養莫逮興言及此沉痛在衷爰命禮官式
揚徽典稽師言而允穆率列祖以攸行正儼極之尊稱
建易名之顯號乃卜某月某日祇告天地宗廟社稷恭
上尊謚曰孝恪淵純慈懿恭順贊天開聖皇太后嗚呼

天高地厚難酬罔極之恩日照月臨丕聞無疆之譽庶
幾有辭於永世豈惟致慕於終身凡我臣民體予至意
布告中外咸使聞知

擬立皇太子詔

隆慶元年

朕惟帝王總理天地司牧黎元守器垂統必建儲貳蓋
所以推明至公安固大本為宗廟社稷計至深遠也朕
屬承昌運嗣守丕基思所以光闡鴻烈克隆鼎祚圖惟
艱大夙夜不遑而文武群臣合誠奉表請建東宮陳懇
再三理難終拒長子某天日奇姿狗齊異稟慶靈所積
四方繫心朕廼遵前王之令謨奉列聖之彝訓用狗僉

議爰舉盛儀遂授冊寶立某為皇太子建元良而貞萬
邦主乚鬯而尊九廟承華載闢遠邇均歡爰布洪恩用
答欣望所有合行事宜條具于後云云嗚呼世德作求
以燕翼于萬葉皇極歛福用敷錫厥庶民眷爾多方同
斯大賚詔告中外咸使聞知

擬立皇后詔

萬曆六年

朕恭膺天命嗣守祖基夙夜兢兢欲保茲歷服傳之世
世睠茲大婚之禮所以昌祚基化人道重焉邇者聖母
仁聖皇太后聖母慈聖皇太后特諭所司簡求令淑作
配朕躬仰遵慈命謹昭告天地宗廟于萬曆六年二月

十九日冊立王氏為皇后正位中宮以共承宗祀奉養兩宮布告中外咸使聞知

擬加上兩宮尊號詔

朕惟帝王之孝莫大尊親稽我祖宗列聖致隆所尊顯號鴻名有加無已孝思維則具有憲章朕嗣位之初屬在幼冲罔知攸濟惟我聖母仁聖皇太后聖母慈聖皇太后擁佑眇躬勞心鞠育提持周至誨迪惟勤朕夙夜訓行罔敢違越圖惟政理于今七年方內乂安四夷率服豈予寡昧能勝負荷皆我聖母洪恩明訓所由致也茲者祇遵慈命嘉禮具舉保護有成永錫祚胤惟此勲

德超軼前聞高厚難量劬勞莫報雖已登夫尊號尚未
極其徽稱爰考成彛祇告于郊廟社稷率文武群臣謹
奉冊寶加上聖母仁聖皇太后尊號曰仁聖懿安皇太
后聖母慈聖皇太后尊號曰慈聖宣文皇太后申薦殊
常之慶少伸酬報之情宜霈明恩用刑廣愛所有合行
事宜開列于後云云嗚呼就養無方式備兩宮之令典
錫類不匱永諧萬國之歡心布告中外咸使聞知

擬封尚永琉球王詔

朕受天明命奄旬萬方薄海內外罔不來享延賞錫慶
恩禮攸同惟爾琉球國遠處海濱恪遵聲教世修職貢

足稱守禮之邦故國王尚元紹序膺封臣節采謹茲焉
薨逝悼切朕哀念其侯度有常王封當繼其世子永德
惟象賢惠能得衆宜承國統永建外藩特遣正使某副
使某齎詔徃封為琉球國中山王仍賜以皮弁冠服等
物凡國中官僚耆舊尚其協心翼贊畢力匡扶懋猷勿
替于承先執禮益虔于事上綏茲有衆同我太平則亦
惟爾海邦無疆之休故茲詔示咸俾知悉

制策

擬丁丑廷試制策

萬曆五年

制曰朕惟自古帝王撫運握圖統一寰宇所以綜緝庶

務調劑群品其道蓋多端矣至語其治效自詩書所述
章灼較著則莫盛于虞周夫其七政齊庶尹諧六府修
三事治與夫謨烈啓佑禮樂刑政煥然也朕甚嘉之慕
之未審果繇何道而致然歟或謂舜兢業萬幾文王自
朝至日中昃不遑食也惟其精勤故化理若是然書稱
庶獄庶慎文王罔兼而孔子復謂舜無為而治何欵哉
太祖神聖乘乾再造函夏建立法制博大詳密用以濟
世平康與虞周媲美盛矣御曆三十餘年早朝宴罷未嘗
時刻少怠其所以畏天人而衍昌祚者視舜文其道同
歟朕以冲昧獲纘丕基慄慄夙夜圖所以順帝則建皇

極以庶幾帝王之治者今且五年經費節矣而帑庾未
充賦歛寬矣而民生寡遂守宰久任矣而吏治罔宣伍
籍加覈矣而武備靡振豈因循之積習難驟變歟久弛
之舊章難遽舉歟茲欲革文冒破拘攣使人得其情事
循其理將何如而後可蓋盛帝顯王人稱之必曰大有
為乃復有謂王者中心無為以守至正此其說安是將
各有主謂不相蒙歟抑或其道相須也予大夫習先聖
之術其於古今治理之原講之豫矣尚各攄所蘊明著
于篇朕將覽而擇焉

勅諭

擬諭禮部加上兩宮尊號

朕以冲年纘緒夙夜慄慄恒懼弗勝仰賴聖母仁聖皇太后聖母慈聖皇太后撫育教訓于今七年八表同風道洽政治茲者祇遵慈命嘉禮告成仰慰我皇考神靈延慶宗社功德隆重莫罄報酬宜加上徽號隆稱用少申朕愛敬尊崇之孝爾禮部便擇日具儀以聞

擬諭內閣重修會典

朕仰承祖宗列聖之鴻休獲纘丕緒夙夜祇懼圖惟治理則亦惟我祖宗之舊章成憲是守是遵仰惟皇曾伯祖孝宗皇帝命儒臣所纂大明會典一書其於我祖宗

列聖創業垂統典章法度之詳通變宜民因革損益之迹固已綱目具存足垂彞憲第簡編浩穰精覈實難我皇祖世宗皇帝嘗見其一二舛誤申命儒臣重加校輯比及進覽訖未頒行蓋猶未當聖心不無有待于後且自嘉靖己酉而來于今又歷二十八載中間事體亦復煩多好事者喜于紛更建議者尠諳國體法令數易條例紛紜牴牾百端援附靡準我祖宗之良法美意幾于淪失今特命卿等查照弘治嘉靖年間事例擇日開館分局纂修校訂差訛補輯缺漏其近年六部等衙門見行事例各令選委司屬遵照體例分類編集審訂折衷

開具送館卿等督率各官會同考實務令諸司一體前後相貫用不失我祖宗立法初意以成一代畫一經常之典昭示無極庶副朕法祖圖治至意其總裁副總裁及纂修等官職名并合行事宜陸續開具來聞欽哉故諭

擬諭遼東巡撫張學顏

遼東三面鄰寇向苦鈔暴自爾撫治以來簡將練兵除戎足餉繕治亭障修明法紀屢陳兵捷一鎮改觀茲者醜虜匪茹驅率腥羶之衆深入瀋陽而爾能沉機料敵先事戒嚴諸將協心三軍用命霆驅電激大致克捷鯨

鯢駢首以就誅犬羊褫魄而奔遯懿此戰功近所希有
捷書來奏朕甚嘉之特陞授爾勲階給與應得誥命賞
銀六十兩紵絲四表裡廕一子入監讀書仍賜勅獎勵
爾尚益懋忠勤弘宣威畧乘是暇豫莫忘牖戶之綢繆
作我藩翰永奠金湯之壯固則予與爾尚有崇陟焉欽
哉

擬諭遼東總兵李成梁

頃者東虜糾集醜類突犯瀋陽蓋乘冬月不戒之時冀
遂溪壑無厭之欲而爾能廣布間諜預探虜情擇地設
奇分部材勇奮麾指顧士皆殊死鬪使虜首尾銜決死

傷大半輜重皆棄盡氣狂奔遺骸填河哭聲震地數十年來未有與虜堂堂陳于平原廣野之間致克捷如此者真可謂奇功已茲特加爾太子太保賞銀八十兩紵絲六表裡廕一子錦衣衛世襲正千戶仍賜勅獎勵以旌爾勲嗚呼我兵屢勝所貴持盈虜憤方深尤宜慮後爾尚益弘遠略無忘戒心簡練以時督率勿怠務使士盡賈其餘勇虜懸憚其威聲則雖古之名將亦奚以加茲爾其欽哉故諭

擬諭薊遼總督楊兆

朕仰承烈祖神宗之耿光丕庥四方萬國靡不懷服蠢

惟東虜恃其控弦之衆憑陵邊鄙無歲無之朕以爾蔚
有遠猷心在王室授之專閫冀紓東顧之憂而爾能殫
竭忠勤督勵將士調度方略悉中機宜頃虜乘我解嚴
飄忽東犯而各該兵將聞警雲集寔張犄角之形以遏
跳梁之勢斬首二百奪獲馬駝兵械無算餘虜狼顧惕
息視魄奔遯大伸中國之威靈時惟爾功捷書馳聞朕
心嘉悅特用授爾勲階給與應得誥命賞銀六十兩紵
絲四表裡廕一子入監讀書仍賜勅獎勵嗚呼威武奮
揚既著發縱之效邊疆底定尚紆善後之圖宜益勵其
初心用對揚于休命爾其欽哉故諭

擬諭琉球王尚永

皇帝勅諭琉球國故中山王尚元世子尚永惟爾先世
守此海邦代受王封克承忠順以迨于爾父尚元畏天
事大益用小心誠節屢彰寵恩游被遽焉薨逝良用悼
傷爾為冢嗣克濟厥美群情既附宜紹爵封茲特遣正
使某副使某齎勅諭封爾為琉球國中山王并賜爾及
妃冠服綵幣等物爾宜恪守王章遵述先志秉禮循義
奠境安民庶幾彰朕無外之仁以永保爾有終之譽欽
哉故諭

擬諭祭禮部尚書某

惟卿德度溫和才華典瞻漱芳家學騰茂賢科肆讀中
秘之書遂擅詞林之譽超宗振采炳蔚以昌再傳考父
矢恭僣倭而承三命荐升華于少宰爰正位于秩宗方
資夙夜之寅清用叙錫豐之典禮忽驚風水奪我著龜
屬當賜環之期乃兆夢瓊之異遽聞訃奏良愴朕懷是
漣卹恩特營葬域并頒諭祀用荅徃勞爾靈有知尚其
歆服

條麓堂集卷之五

誥勅

太子太傅工部尚書雷禮四道

制曰國家倣古大司空之制乃設工部尚書俾率屬分職以程品百工奠民平土任至隆也自頃殿工丕作宮建聿興庀用僉功參任繁重非得小心任事之臣曷以副朕作新之寄哉咨爾太子太傅工部尚書雷禮宇度閎深才猷膚敏盡心徇國越始終而不回守道立朝涉夷險而若一自筮仕以及於今日隨所履皆流乎茂聲追顯陟于冬卿益殫勤于事典經營不懈在夙夜而尤

一
處節縮有經雖錙銖而不爽用是弘我維新之制而民
無供億之煩其爾之休唯朕以懌爰登崇品以報殊勞
及茲復歷于三年嘉績益多于往昔是用進爾階光祿
大夫勲柱國錫之誥命嗚呼赤誠報主則臣無不盡之
心倚毗得人則國無難成之事眷爾忠敬簡在予心爾
尚服此殊榮益堅乃節俾民力普存余一人永膺多福
則爾亦有無窮之聞欽哉

制曰妻以婉德取義既嚴于齊體故願乖偕老而推恩
亦懋于從夫所以錄服勞之往績厚人倫之大始雖屢
錫而益隆無所靳也爾太子太傅工部尚書雷禮妻贈

夫人李氏蚤以惠溫作配君子方在尚志而爾寔操其勤亦既致身而爾弗共其福是可追悼已茲爾夫秩既崇特加贈爾為一品夫人服此明綸永光幽壤

制曰賢臣篤忠貞之節以勤於國與令妻執順正之道以相於家其善同也故國家叙錄臣下功伐必併及其閨閭以隆恩施彰獎勵焉爾太子太傅工部尚書雷禮繼妻封夫人涂氏夙閑姆訓式備婦儀是佑名德蔚為時哲允此夙夜在公之勞多爾儆戒相成之益茲特加封爾為一品夫人尚寵膺夫綸綍愈加慎于蘋蘩

其二

制曰人孰無昌後之願然必德厚者而後其澤昌人孰
無追遠之心然必功崇者而後其報遠我國家因功而
制爵緣分以推恩其褒崇之制越祖而曾者惟上卿為
然爾其寵數豈不隆且異哉爾雷啓陽乃太子太傅工
部尚書禮之曾祖父行誼甚高鬱而不顯積善甚富久
且益昌乃茲三世之孫奮起百年之後顯登宮揆作朕
股肱迹其積累之洪基宜用褒崇之懋典茲待贈爾為
光祿大夫柱國太子太傅工部尚書眷惟不昧之明靈
歆此非常之寵命

制曰婦人言不出閭其嫔節清芬即當時聞於人者甚

矣而乃數世之後克享令名者自非明德所垂貽範遠而流慶長也奚以致此爾熊氏乃太子太傅工部尚書雷禮之曾祖母莊敬勗身慈仁逮下用贊德美以流慶祥實使後昆誕食其報宜申褒綍錫寵重泉茲特贈爾為一品夫人尚歆翟芾之光華以綏曾孫之孝享

其三

制曰記稱自義率祖詩詠貽謀厥孫故我朝于丞弼之臣樹有顯榮為國家所倚毗者則必原貽謀之善施以率義之恩典至隆也爾贈資政大夫工部尚書雷遂冲乃太子太傅工部尚書雷禮之祖父積學有聞與物無

忤惇德自己責報于天再世而昌榮躋八座乃益弘于
嘉績遂崇陟于宮端不有鴻恩曷昭燕翼茲特加贈爾
為光祿大夫柱國太子太傅工部尚書宣被寵靈庶知
歆服

制曰秉德錫祚祖有功焉然所以佐相功能宏衍慶澤
則亦伉儷同德之助爾故追崇之典義所偕及爾贈夫
人揭氏乃太子太傅工部尚書雷禮之祖母百順事姑
一經啓後淑訓所漸佑于聞孫克勤于邦茂膺崇寵爰
頒渙命增賁重闡茲特加贈爾為一品夫人祇服渚恩
永綏烝洽

其四

制曰士有負奇含懿厚積而不究于用者其蘊澤遺祉
必駿發于嗣人故國家優禮大臣而必推恩所自者匪
直以酬顯勲抑亦以彰潛德也爾贈資政大夫工部尚
書雷邦鑑乃太子太傳工部尚書雷禮之父學務自得
行必稽古士習教以知方民覲德以歸厚而握瑜不售
施于後人率是義方為時碩彥爾之餘慶足徵已茲特
加贈爾為光祿大夫柱國太子太傳工部尚書貴恩命
於重泉闡休聞於永世

制曰昔孟母徙宅以端蒙歐母畫荻而示訓卒成厥嗣

為世大儒古今稱賢母者必歸焉徵于子也爾贈夫人
鄭氏乃太子太傅工部尚書雷禮之母婦順明章母儀
聖善提言容于圖史昌胤祚以詩書肆我良卿為國楨
榦不于歐孟有光哉鼎釜方來風水不待子之心有永
威矣茲贈爾為一品夫人用弘褒卹之恩以慰劬勞之
感

禮部尚書兼翰林院學士高儀三道 其三闕

制曰南宮地峻特隆禮樂之司東觀職親式重經綸之
寄維石具瞻于俊又寔天純佑我邦家乃眷元僚用弘
大賚咨爾禮部尚書兼翰林院學士高儀字量宏深性

資貞毅淵淳學海多士賴其典刑王立朝端百辟仰其
風采久騰英茂洊歷高華由文學侍從之班踐夙夜寅
清之任王之喉舌補周袞之闕文職在機衡習漢家之
故事肆予訪蒞之始賴有老成之人懷柔百神舉不愆
于儀物允釐百度動必協諸典常美哉稽古之功佑我
紹庭之治是溥褒嘉之寵命用酬翊戴之殊勤茲特進
爾階資政大夫錫之誥命於戲儒者以德藝發身位望
莫優於學士國家以承弼贊化登崇率簡自秩宗緊爾
多勲孚于衆望號令文章之可述已昭潤色之猷神人
上下之咸和尚賴協恭之助欽哉勿替光我訓辭

制曰禮行于邦國惇庸寔藉于鉅寮化始于閨門順正
適資于淑媛是以疇庸之典覃被于官聯從爵之榮必
偕于伉儷斯謂稱也有其舉之爾禮部尚書兼翰林院
學士高儀妻累封淑人鍾氏式奉母儀明章婦順采于
沼沚薦筐宮以有齊宜其室家如琴瑟之靜好迺瞻寅
清之顯績聿昭儆戒之芳猷爰溥恩褒增榮命服茲特
加封爾為夫人三命益赫顯膺冠帔之華四德罔愆懋
正紀綱之首

其二

制曰君子積善于家者厚則夫厥後必昌人臣效忠干

國者深則其為報必重故國異上卿之禮特隆貤祖之恩匪惟昭命數之攸崇亦以溯慶源之有自爾贈通議大夫吏部左侍郎兼翰林院學士高某乃禮部尚書兼翰林院學士高儀之祖父履素居貞抱和守靜孝友之譽旁達于一鄉仁厚之澤施及于再世典朕三禮寔爾元孫制度考文既著嚴廊之績報本追遠宜延廟祐之休茲加贈爾為資政大夫禮部尚書兼翰林院學士繼文陟命光增八座之儀犀軸宣綸永作九京之貴制曰忠臣之事君也不以先後易節貞婦之事夫也不以存亡改慮雖國家之致固異而代終之義則同矧予

禮樂之良臣上有貞慈之祖妣宜崇褒典用闡幽芳爾
贈淑人周氏乃禮部尚書兼翰林院學士高儀之嫡祖
母敬以承宗德能宜室崇樛木之澤逮下惠和矢栢舟
之貞育孤成立百歲而守弱子亶人情之所難再傳而
啓聞孫寔天道之不爽茲加贈爾為夫人徽稱躋峻頒
渥寵于泉臺雅操光昭樹耿儀于風化

制曰朕觀圖史所載閨閣之良或恒一德以終身而未
必自于蚤歲或罹百艱以撫子而未必亢乎厥宗亦既
歷邈代以稱賢掩中閨而擅嫿矣爾贈淑人包氏乃禮
部尚書兼翰林院學士高儀之祖母溫惠提身幽閑自

性于歸不日遽失所天近親鮮助于暮功遺稚未離于
提抱拮据夙夜備歷人艱饋享春秋竟廷宗祀再世而
下是生偉人蓋天地鑒其精誠而門閭于焉高大茲加
贈爾為夫人渙恩申賁于及泉介福永延于奕世

吏部左侍郎兼東閣大學士張居正三道

制曰朕祇奉天休寅承帝緒爰念樞機之重慎簡鼎臣
載嘉翊戴之勞懋頒渙渥眷惟舊學服此明恩咨爾吏
部左侍郎兼東閣大學士張居正惟嶽降神自天挺秀
道包王佐識治理之本原文蔚國華窮性術之變化越
從蚤歲擅譽詞垣胄監談經多士服其懸解木天視象

九流藉以疏通惟文考之知賢翼冲人而置傳納誨朝夕弼直後先講貫詳明大義不殊於指掌敷陳懇惻嘉謀期在於沃心凡所聞於爾言悉有孚於予聽肆以寡昧入奉宗祧若濟巨川尚賴交修之益念惟小愆勉為緝熙之圖斷自朕衷爰立爾相冢卿陪貳表儀百辟之端秘閣外華密勿萬機之地天工資其寅亮師言于是僉諧不有褒綸曷彰寵數茲特進爾階通議大夫錫之誥命於戲崇禮樂詩書之術既羽翼于朕躬參疑丞輔弼之聯用金玉于王度尚紆多績勿替一心朕欲穆三光而撫五辰爾惟調燮朕欲正百官而康兆姓爾惟翼

為庶幾邦有無疆之休則汝亦有無窮之聞欽哉

制曰黃扉贊化代終寔賴於元臣彤管垂風正始必資
於哲媛故邦國舉疇庸之典則室家有從貴之榮命數
惟均存亡靡間爾吏部左侍郎兼東閣大學士張居正
妻累贈宜人顧氏毓和名閼儼德吉人敬戒無違守
衿輦之炯訓溫惠有則遵圖史之令儀德音方洽于
好逮深願忽違于偕老嗟降年之不永惜往日之已
遐茲惟踐祚之明恩用鬯漏泉之渥澤特贈爾為淑
人嗚呼錦誥斯皇命益崇于三錫窈封有赫靈誕受
于九京

制曰君子承弼厥辟著夙夜匪懈之忠良由宜其家人
有朝夕相成之效故臣行其義則君致其仁夫貴於朝
則妻榮於室禮之經也恩可後乎爾吏部左侍郎兼東
閣大學士張居正繼妻累封宜人王氏體含靜嘉德成
順巽告虔棗栗晨昏嚴繁褰之儀羞敬蘋蘩春秋慎筮
筐之薦內言不出壺範用彰肆予秉德之臣克殫在公
之慮周邦作尹式副于民瞻冀野如賓寔資于內相是
降絲綸之寵載陰冠帔之華特封爾為淑人錫命至三
游陟上公之禮從爵惟一永綏中饋之禧

其二

制曰謀翼子而詒厥孫家之餘慶仁率親而至于祖國
之上彛蓋以滌其積累之勤而因致其本原之報矧惟
近弼若時百工宜有殊恩仰延再世爾張鎮乃吏部左
侍郎兼東閣大學士張居正之祖父踈朗多奇沈雄好
義矜尚氣節為鄉井所同推不求譽聞甘立園以自貴
本深未茂蓄極流昌施及聞孫為予碩輔仁者必有後
固已徵諸感通盛德為之前是用優夫報禮茲贈爾為
通議大夫吏部左侍郎兼東閣大學士嗚呼再世而昌
肇家聲于惟舊九京可作沐國寵于方新光貴宗祊永
錫祚胤

制曰詩歌祖妣聿推似續之原禮逮臣工越有追崇之
典蓋雖以義而起然必緣分而隆國具舊章朕用大賚
爾李氏乃吏部左侍郎兼東閣大學士張居正之祖母
禔身克協于肅雍治內不忘于恪慎婦儀式備作範重
闈慈訓於昭騰芳奕葉眷予哲輔寔爾聞孫奮庸攸賴
于國楨懋賞且延夫家慶茲贈爾為淑人蘭蓀振秀頌
丕貺于明庭松檟蒙暉貴休光于幽室

其三

制曰君子韜經綸之畧而式訓于子蓋所以教忠朝廷
隆體貌之文而貤爵于親亦因以勸孝故蓄之久者發

斯盛而積之厚者享必豐天道有常國章斯在爾累封
奉直大夫右春坊右諭德兼翰林院侍讀張文明乃吏
部左侍郎兼東閣大學士張居正之父性秉厥中德成
而上博學強記懷儒者之珍由義居仁備大人之事雖
璞藏卞玉未諧待價之沽而業受韋經已衍趨庭之訓
睠此攸樞之弼亮寔承家學之淵源莘野君民既不殊
于親見槐階命數宜顯被于在躬茲加封爾為通議大
夫吏部左侍郎兼東閣大學士恩溥重綸躋峻儀于三
事養陰列鼎增馘較于百年茂綏方至之禧究爾未成
之志

制曰臣子之于君親左右有方固效匡時之略明發不寐尤懷愛日之誠故朝廷將以嘉其弼直之勲必先有以慰其顯揚之願陳常自昔錫命惟新爾封宜入趙氏乃吏部左侍郎兼東閣大學士張居正之母能儉與慈終溫且惠敬而必戒婦順克章愛之知勞母儀斯茂肆爾鳳毛之絢采寔惟熊膽之迪勤線綉承庥遯慶源于南國絲綸載命頒寵渥于北堂茲加封爾為淑人三錫申恩涇昌而熾百年具慶俾壽而康諒人世之希聞寔朝廷之勝事

禮部左侍郎兼翰林院學士掌院事潘晟三道

制曰朕誕膺景命光續丕圖深惟夾介之勞爰舉褒嘉之典渙茲華綽序及群工矧于文學侍從之臣重以典禮討論之寄正瞻言其勞勩可獨後于恩光爾禮部左侍郎兼翰林院學士掌院事潘晟器識淵宏性資明劭蚤奉大廷之對特承先帝之知史局珥彤丕振編摩之譽文闡懸鑑屢收獎拔之功直秘閣以代言蒞賢關而造士留銓作貳邦禮攸司具有芳規歷彰雅聞朕用徙自南宮之佐擢居東觀之端而爾果能彌篤忠誠備宣勤效發揮真義學術貫乎百家黼藻洪猷文章炳乎三代茲以霈恩特授爾階通議大夫錫之誥命於戲春卿

秩峻兼居端尹之榮王署望清復拜崇階之寵式優往
績尚冀新勛爾其益告于嘉猷予惟克邁夫乃訓
制曰家之正始恒資婦順以相成國之䟽榮亦制內階
而並授豈徒取從貴之義寔以彰儷德之功彛典具存
明恩曷恡爾禮部左侍郎兼翰林院學士掌院事潘晟
妻何氏出自望閥嬪于德門嚴正弗渝儉勤兼至承宗
克孝采蘋詠其有齊逮下惟仁樛木歌乎樂只恪相夫
子顯陟清卿繫爾之賢有家是式欲旌懿則宜示重褒
茲仍封為淑人懋持儆戒之儀祇服駢蕃之渥

其二

制曰慶源之濬必累世德而後昌褒典之榮必及祖功而後備上荅貽謀之善下酬追孝之思匪我鉅寮曷膺異數爾贈通議大夫禮部左侍郎潘憲朝乃禮部左侍郎兼翰林院學士掌院事晟之祖父稟資軒達負志瓌竒義聲著于鄉閭孝道孚于宗黨積仁累行蓄祉儲祥爰鍾繩武之孫駿發元宗之業普居卿貳簡在朕心推厥所繇惟爾之慶茲特加贈爾翰林院學士餘官階如故用增輝于泉壤尚益祐夫雲仍

制曰尊祖及妣子孫均烝畀之誠錫命疏恩國家竝追崇之典茲惟殊寵寔本至情爾贈淑人竺氏乃禮部左

侍郎兼翰林院學士潘晟之祖母懿質夙成高門作配
雍雍肅肅德音暢于宜家振振繩繩善慶延于裕後爰
及再世即奮聞孫宜申恩綍之光永作幽扁之賁茲仍
贈爾為淑人芳魂如在茂渥其承

其三

制曰天道之報善人祚每隆於厥胤人情之稱令子慶
必遡於所生肆我王章崇茲世德凡酬功而行慶皆錫
類以貶恩爾故郡武縣儒學教諭贈通議大夫禮部左
侍郎潘日升乃禮部左侍郎兼翰林院學士掌院事晟
之父學見本原行遵矩度應州閭之推選為章掖之表

儀乃秉鐸一方丕振湖庠之教洎拂衣故里尤薰晉鄙
之良雖鴻漸未值于亨途而燕翼竟昌于來哲錄詞垣
之最績既有褒榮嘉儀部之茂勞復申追卹茲者屬逢
大慶載錫新綸贈爾通議大夫禮部左侍郎如故仍兼
翰林院學士於戲玉堂蘭省榮竝出于一時鳳誥龍章
寵已膺于三錫爾靈不昧庶克歆承

制曰人子慕劬勞之德生鞠惟均國家體顯揚之情存
亡罔間必愍綸之增被乃慈範之益光茲惟彝章亦云
榮邁爾贈淑人石氏乃禮部左侍郎兼翰林院學士掌
院事潘晟之母性含靜淑則協柔嘉言笑寡形興居有

節事夫而承以儆戒既追輓康之風愛子而教之義方
復覩和熊之事顧機杼竟成其素志而金鍾弗逮于當
年幸未泯之音徽嘗游揚于褒命復申卹典用慰孝思
茲仍贈爾為淑人線縷感深固悵九原之莫作絲綸恩
渥庶期百世之猶芳靈而有知服之無斁

工部左侍郎魏尚純三道

制曰朕獲承洪業普錫明恩用酬翼戴之勞兼示倚毗
之眷矧茲亞旅職貳司空鳩百工以飭材居四民而時
利是稱鉅任可後褒章爾工部左侍郎魏尚純蚤擢賢
科歷更宦轍竭周詢于使職殫心計于民曹三任臬司

激揚益勵五登藩省屏翰彌勤牧卿追汧渭之聲京尹
掩趙張之烈佐栢臺而肅憲長棘寺以平刑迨茲晉佐
冬官參陪政本才猷深于歷試之久望寔孚于衆論之
同四屬是程五材咸用弼成新政惟爾有勞茲特授爾
階通議大夫錫之誥命於戲垂作共工克嫓九官之美
禹平水土旋登百揆之崇勉立功而立名將懋官而懋
賞篤爾令終之誼副予訪落之懷

制曰大夫有宗婦爰資壺職之修恩制有褒崇肆及內
階之授綢常攸繫命數斯隆即偕老之願已乖而初載
之勤不泯爾工部左侍郎魏尚純妻贈宜人白氏夙閑

女誠恪守婦儀既儉且勤懿範行于家室惟恭而孝賢
聲播于族姍克相厥夫既施有政胡遽捐于中道乃不
並其遲榮非錫愍綸曷安冥魄茲特加贈爾為淑人諒
幽靈之有知服休光于無斁

制曰治內必資乎婦德道貴相成推封特視乎夫階禮
優從貴凡德音之克嗣皆渥典之宜加爾工部左侍郎
魏尚純繼室贈宜人李氏系出名宗性成淑訓效動中
職踵美前聲乃不永年既膺褒卹夫茲有游登之秩爾
可無申錫之恩特加贈爾為淑人尚冀芳魂歆承顯命

其二

制曰朕聞源濬者其澤斯長本蕃者其枝自茂粵考後
昆之丕振皆由上世之深培國有彛章例得追報爾魏
興乃工部左侍郎尚純之祖父宅心長厚賦性慈仁偕
群從以同居頗踵義門之事恤親交而共患庶希豪士
之風爰篤慶于英孫遂蜚聲于峻仕祥源有自靈契匪
虛宜加異數之榮以表貽謀之美茲特贈爾為通議大
夫工部左侍郎尚佩殊恩益綏來裔

制曰孫謀之燕雖本祖功世德之深亦闢慈澤恩既推
于再世寵必及于重幃緣子孫報本之至情寓國家勸
功之緝典爾載氏乃工部左侍郎魏尚純之祖母性和

以則德儉而勤持已必莊寂聞言于不出相夫克慎閑家政以咸宜餘慶攸鍾聞孫是發爰申賁命追耀潛休茲特贈爾為淑人英爽如存尚其歆服

其二

制曰人子之願莫大于榮親孝理之仁莫先于錫類朕方體永言之念推追錄之恩覃百辟以無遺豈貳卿之可後爾封奉直大夫戶部四川清吏司員外郎魏宗乃工部左侍郎尚純之父清醇率性恭慎持身列秩藩僚用情色養貽義方之懿範開哲嗣之顯庸績茂兩朝班聯八座遡惟善慶宜有重褒茲特加贈爾通議大夫工

部左侍郎疏恩有渥永增泉室之光流澤無窮益衍雲
仍之祚

制曰母德兼乎訓育匪子弗彰國典重于褒封惟賢是
勸眷此名卿之業繫惟慈教之功惻鼎食之久違幸綸
言之是逮爾封宜人張氏乃工部左侍郎魏尚純之母
惠和惟德莊靜其儀持身敦荆布之風贊祀謹蘋蘩之
則知能勞以濟愛成賢嗣以亢宗未隆褒寵之章詎稱
顯揚之意茲特加贈爾為淑人榮名益夫潛德彌芳諒
爾九泉歆斯再命

通政使司右通政王正國一道

制曰國家設通政司準古納言之職用以出納朕命非
浚明秉直者弗輕畀也咨爾通政使司右通政王正國
乃故太子少保兵部尚書襄毅公正邦瑞之子夙成令
德早奮賢科佩大司馬之詔謀將小行人之使命踐更
省闈閱有歲年獻替不違風裁特著游陟銀臺之貳允
諧喉舌之司簡命不負于先朝丕績茂揚于今日茲朕
以踐祚推恩特進爾階中憲大夫錫之誥命夫命令政
教所以宣上德敷奏復逆所以通下情爾並司之任至
重也尚其夙夜不懈慎審此二者俾讒殄之罔肆庶功
叙之用彰嗣有崇躋究爾遠效欽哉

制曰士有慎修乃德宣力于王家而躋休顯之位必賴
賢淑以相厥中故國家䟽榮大臣爰及厥配所以彰懿
而示勸也爾通政使司右通政王正國妻封孺人藺氏
毓秀闕門作嬪令族克懋爾德允宜於室家肆俾厥夫
悉心於邦國躋階九列譽望日隆爰揆內褒之力用申
寵錫之命茲特加封爾為恭人祇服恩綸益彰壺範
通政使司左叅議倪光薦二道

制曰昔舜當踐位之始闕門達聰首命納言以出納之
允蓋所以亮天工熙衆志以與天下更始急先務也朕
方嗣曆稽聖作範思以宣德達情則亦惟是出納之臣

是賴委寄斯重錫賚所宜先焉爾通政使司左叅議倪
光薦蘊致宏深識鑒疏朗試改劇邑有廉平之稱司諫
瑣闥著直方之烈乃晉陪于九列用道進于百司休有
譽聞播于遠邇茲予訪落申舉朝章禮久廢而不修人
多遽而失措而爾敷陳詳雅進退雍容協典禮之大閑
為朝廷之壯觀朕嘉乃績特授爾階奉政大夫錫之誥
命嗚呼天下之利病多端夫人之情偽萬狀爾其益練
故典丕協群情勿使幽遐艱于上達勿使讒殄震于朕
師朕將嗣疇爾庸也欽哉

制曰人臣夙夜在公獲矢其不懈之節則其室家朝夕

有恪克致其相成之益者可知也是以褒忠之典伉儷
同之爾通政使司左叅議倪光薦妻封孺人王氏順正
無違閑于內則克相夫子著績中朝茲方覃予踐祚之
恩是用篤爾宜家之慶特封爾為宜人尚膺鸞誥之褒
崇勿替鷄鳴之儆戒

其二

制曰君子懷負道德而不獲大顯于時則其未究之用
不盡之澤必于厥後昌之此天道也爾原任山西徐溝
縣儒學教諭贈直隸松江府華亭縣知縣倪汝庶乃通
政使司左叅議光薦之父經學起家義方啓後造道甚

正足稱善人積慶方深是興賢子百里報政已霑漏澤之恩九卿宣勞更衍增階之命特贈爾為奉政大夫通政使司左叅議眷惟幽窆服此明綸

制曰女德不出閭然于其夫可徵其能婦于其子可徵其能母故國家賜親之典母與父偕非以彰慈順與爾封太孺人張氏乃通政使司左叅議倪光薦之母終溫且惠服儉與勤相夫甘守其齏鹽教子能陳其俎豆安享祿養游沐恩褒可謂榮壽已茲進封爾為太宜人顯膺再命之榮益葆百年之祐

通政使司右叅議何永慶二道

制曰國家設通政使司典天下章奏及百司案牘以進
御而分布之蓋兼前代進奏院銀臺司之職至特與六
曹竝列為大卿則秩視昔為隆重矣故常妙揀才哲以
充是任而矧朕嗣服之始哉爾通政使司右叅議何永
慶發身賢科試政嚴邑具通敏之才識有精明之治功
遂進職于郎曹乃益習于國典茲予初膺纂大之命思
弘維新之圖雖百工咸藉于得人而庶政尤期于詳慎
是用拔爾于韜鈴之署寘爾于喉舌之司資朝夕之恪
共冀出納之惟允乃以登極覃恩特授爾階奉政大夫
錫之誥命嗚呼四海之廣兆民之衆其憂樂利病得以

悉徹朕聰者惟爾是賴百工庶務所以糾檢違失督發
淹緩以頒布中外則亦唯爾是司爾尚克暨厥心勿替
朕之休命哉

制曰夫婦有齊體之義是以國家之推恩也亦有從爵
之典蓋雖緣情定制而寔因義以起禮耳爾通政使司
右參議何永慶妻趙氏夙開壺範作嬪吉人溫且惠以
淑其身順以巽而主中饋肆爾夫得以宣勞邦國固有
內顧者其得干室家之助多矣茲特封爾為宜人尚膺
冠帔之榮益謹衿幃之訓

其二

制曰朕纂承先業思弘繼述廼錫類臣工俾咸遂厥顯
親之願冀以廣孝思于不匱焉耳爾何朝王乃通政使
司右叅議永慶之父寬裕能容剛介有守砥名礪行見
重于鄉悅禮敦詩克昌厥後播休聲于九列徵善教于
一經宜有追褒彰予大賚茲特贈爾為奉政大夫通政
使司右叅議渙布漏泉之澤永增禰廟之光

制曰入子之能立身行道以終顯揚之孝者匪獨其父
教嚴也廼其母亦必有慈訓焉是以恩馳之典必併及
之爾王氏乃通政使司右叅議何永慶之母柔順含章
節儉為寶治內式彰大壺範教子克成夫令名屬祿養

之方隆及慈齡之未艾眷惟榮壽良用褒嘉特封爾為
太宜人茂被明恩永綏介福

工部尚書徐杲三道

制曰工部在古為冬官之職而尚書寔惟常伯之任位
高祿厚服在大寮自非顯有功庸孚于衆志豈以輕畀
之哉咨爾工部尚書徐杲惻惻有恆忠誠不二游更任
使積有年勞頃因殿制維新宮工丕作飭材制度節其
出入之經程藝考工竭其巧力之用其計工也大且博
其奏效也速而精予懋迺功登之卿正用熙庶績抑又
三年茲特進爾階資政大夫錫之寵誥嗚呼粵考我室

既勤堂構之勲疇若予工尚賴股肱之力爾其益既厥心克守常憲以永保朕之丕顯休命欽哉

制曰人臣宣力國家夙夜在公靡中顧憂者允以同德之配為之內助焉爾故褒勤之寵必竝及之禮之經也爾封淑人楊氏乃工部尚書徐杲之妻必敬而戒終惠且溫相我上卿為之元配可謂得所從已茲加封爾為夫人尚承翟茀之榮益靖筥筐之職

其二

制曰自古侯王之貴其世或湮廢無聞而名卿大臣多奮起布衣之後蓋其積善之效有以致之矣爾贈中大

夫太僕寺卿徐季誠乃工部尚書杲之祖父際世隆平
居鄉敦朴慶延後裔再傳而昌積有功勳升華常化茲
特贈爾為寶政大夫工部尚書超躋彝等服此殊榮
制曰烝洽祖妣慈孫所以追遠也故大臣得推恩及祖
者必偕及其妣焉爾贈淑人周氏乃工部尚書徐杲之
祖母越有聞孫躋位崇顯致身奉職為我邦材推本疏
榮錫爾家慶茲加贈爾為夫人重泉豈遐新恩孔奕

其三

制曰忠孝一道也故為臣能致匪懈之恭其為子必思
效罔極之報是以國家褒叙臣庸類貤及禰廟所以獎

移孝之休以懋作忠之典耳爾贈中大夫太僕寺卿徐
恭乃工部尚書杲之父積善在躬流慶于後篤生哲嗣
為國才臣克若百工致身八座迨茲奏績是用加恩特
進爾階資政大夫工部尚書庶俾人臣知能竭忠于國
亦有崇寵于家也哉

制曰家有嚴君曰父與母其分同也故疏榮之典必併
及之亦以體人子報本之心焉耳爾贈淑人朱氏乃工
部尚書徐杲之母寔生令子作我幹臣積有勲勞淳膺
崇寵慶源所自寔爾之休茲特贈爾為夫人尚克歆承
祚于爾後

吏部考功司郎中武金二

制曰朕嗣承大曆深惟化理之原閔諸吏治簡惰窳以
警不恪弘錫賚以昭有恩蓋振舉誅賞之大端而作新
于始政耳考功部正掌群吏之殿最以佐太宰詔予廢
置者褒賞所宜先也爾吏部考功清吏司郎中武金士
行純備吏能甚優試邑政而民稱其廉平贊邦禮而衆
推其練達積是清望選于劇曹綜核公明名寔孚乎物
論討議周慎流品正乎舊章茲予方摠師而率百官資
爾以官計而弊邦治是頒渙渥用獎殊勤特授爾階奉
政大夫錫之誥命嗚呼邦之否臧惟茲有位幽明黜陟

唐虞所以熙庶績者繇是道焉爾尚益殫令猷務宏遠績無寧虔始而永終是圖則予汝嘉欽哉

制曰婦人與夫齊體者也故約泰同之國家制為從爵之典每視天階而異其命數焉不以存亡間也爾吏部考功清吏司郎中武金妻贈安人呂氏克宜其室不永于年曩因爾夫奏閼已頒祔典矣茲覃大慶再進徽稱特加贈爾為宜人淑靈有知湛恩是服

制曰人臣能秉銓鑑以辨官聯則必能慎威儀以刑內治朕茲覃澤百辟而因及其伉儷者所以褒臣共錄婦順也爾吏部考功清吏司郎中武金繼室封安人畢氏

作嬪君子克配德音宦績孔多式彰內助既顯膺夫命服宜申渙夫綸音茲特加封爾為宜人尚承淳至之恩益懋相成之義

其二

制曰朕纂承先業紹庭上下冀以弘永世不匱之恩錫類百辟俾咸遂厥慕親之情光孝理焉爾贈承德郎吏部稽勲清吏司署員外郎事主事武邦衛乃吏部考功清吏司郎中金之父積善有餘而享不酬德嚮道未艾而年不待志歛是具美詒厥嗣人振譽天曹贊我邦治宜有顯渥發爾幽光茲加贈爾為奉政大夫吏部考功

清吏司郎中匪獨慰孝思于罔極抑以表仁者之有後
制曰栢舟矢操之死靡它此固圖史所共賢也矧是百
艱哺遺育教撫孤成立卒延厥祀而大競于有室豈不
尤足賢與爾封太安人畢氏乃吏部考功清吏司郎中
武金之母蚤失所天誓心皦日拮据夙夜忘在己之為
勤饋享春秋唯夫宗之是恤肆成令子為我望即顯被
綸褒安享祿養得天之佑可徵也茲加封爾為太宜人
以明示寵崇俾天下貞婦慈母知有攸勸

刑部江西司郎中劉廷舉二道

制曰昔臯陶明刑弼教民用不犯而帝舜課能論烈至

以從欲之治歸之褒獎嗟咨若不置口侈之謨典流耀
無窮今朕方監祥刑以登至理而庶幾有淑問之臣則
亦典之所宜勸也爾刑部江西清吏司郎中劉廷舉擢
穎制科蜚聲吏治親民贊計累著賢庸敷歷既深擢居
憲屬乃能佐明允之政絕枉撓之私邦禁稱平爾功寔
懋茲特授爾階奉政大夫錫之誥命夫刑者民之司命
也必終始盡心焉爾其勿替初勤朕亦將有顯陟

制曰婦道之所繫重矣三南之詠關於化原如賓之儀
以基祥命故國家疏恩庶職而竝秩中閨禮也爾李氏
乃刑部江西清吏司郎中劉廷舉之妻壺儀不爽中職

克虔相夫服官焯然有譽即章之象服何愧焉茲特封
爾為宜人益蹈芳規用承榮號

其二

制曰夫人奮樹聲業貽父母令名豈皆其自樹哉蓋多
義方之教焉朕于通籍之士褒及所生念夫始之者也
爾劉濬乃刑部江西清吏司郎中廷舉之父敦朴不華
秉心維塞忠信之迪衍為義訓今子能竭誠從政為世
聞臣皆爾之所成也茲特贈爾為奉政大夫刑部江西
清吏司郎中非徒慰棄養之悲亦以表貽穀之報
制曰詩不云乎母氏劬勞故顯揚之報人子有同情焉

而矧于不逮養者哉朕用深恤其私優之褒命爾丁氏
乃刑部江西清吏司郎中劉廷舉之母莊靜令儀儉勤
懿德相夫而永貞其志教子而克底于成顧一日之養
弗延而終天之感增切有足悲焉茲特贈爾為宜人綸
綍有光幽冥足慰

吏部稽勲司員外郎孫光祜二道

制曰天曹設有勲部掌校定勲階論功行賞凡有封授
咸委之覆定而奏擬焉所以慎施予重名器也至于邦
有大慶則特頒曠恩而不以棠制拘焉申命司勲其明
承朕貺爾吏部稽勲清吏司員外郎孫光祜識度鎮朗

蘊致沉深射策衆推其俊良佐郡民服其平允遶登銓
省適孚與評慎慮以杜吏欺精神而辦邦治朕方訪諮
董正治官嘉乃忠勤用覃恩賚特授爾階奉直大夫錫
之誥命嗚呼功懋懋賞朕方致愛于笑輝思贊贊襄爾
尚簡稽其勞伐惟爵命之不苟斯事功之可興資爾令
猷贊予新政汝往欽哉

其二

制曰忠孝一道也為人臣而能盡其小心則為人子必
能致其深愛是以國有貤典使為人親者承之凡以教
忠而勸孝耳爾孫振宗乃吏部稽勲清吏司員外郎光

祐之父學術崇邃操履端方廿載潛心願因酬于操瑟
一經授子功竟獲于為裘是叙官常式彰庭訓永惟懿
則宜有褒綸茲特封爾為奉直大夫吏部稽勲清吏司
員外郎顯迓自天之寵用紆愛日之誠

制曰朕方崇先烈而上徽稱思以體群臣而弘孝理故
普覃勲典榮其父而因併逮其母洽于明而亦不遺于
幽恩至渥也爾韓氏乃前南京戶部尚書重之孫女吏
部稽勲清吏司員外郎孫光祐之前母毓秀名閥習聞
壺訓亦既宜室乃不永年茲爾夫既膺子貴之封則爾
亦宜從夫之爵時用贈爾為宜人泉室有靈服此殊典

制曰詩詠螽斯而必繼之樛木之後以明周之子孫衆多繇大妣之能逮下耳故聖人列為風始端王化焉爾姚氏乃吏部稽勲清吏司員外郎孫光祜之嫡母孝敬無違惠和有則相夫慎而不失其令儀育子慈而克衍其義訓安享祿養既壽且昌福履之綏可徵已茲特封爾為宜人象服有暉遐祉未艾

刑部廣西司員外郎栗魁周二道

制曰朕初纂丕圖思覃渥澤哀矜庶獄弘在宥之仁敷錫群工舉酬庸之典恩蓋無不浹也若司寇諸大夫寔率以民彝以贊朕哀矜之治者顧酬典可獨後與爾刑

部廣西清吏司員外郎栗魁周發身甲第佐理邦刑從政有聲臨文無害邇以閱書奏最勅褒爾勲矣茲復進爾階奉直大夫錫之誥命嗚呼民命攸寄厥惟內外司憲之臣爾之明允既著聞于內矣朕復陟爾出僉外臬用導予從欲之治爾徃欽哉

制曰士君子能制民于中以肅邦典必自其正身端軌閑于家者始之故詩詠御邦之美而以刑于先焉明立政之有本也爾贈安人郭氏乃刑部廣西清吏司員外郎栗魁周之妻女德夙備婦順明章相夫從政蔚有令聞褒典方來而爾不待有足悼者茲加封爾為宜人靈

懿未遐歆茲寵賁

其二

制曰君子履道自己必垂而為貽厥之謀積善在家必
行而為有餘之慶故國家需恩臣下而恒推及其親者
所以泝慶源彰義訓也爾贈承德郎刑部廣西清吏司
署員外郎事主事栗越乃刑部廣西清吏司員外郎魁
周之父履貞抱素見重于鄉儲祉發祥克昌厥後肆惟
令子為我才臣治行章聞惟爾之訓屬當大賚可新申
褒茲加贈爾為奉直大夫刑部廣西清吏司員外郎歆
斯再命之榮永作九原之賁

制曰愛之能勞賢母所以成子養而不逮孝子所以思親故國有寵章不以存亡間者匪特以慰劬勞之慕亦所以昭慈訓之良耳爾贈安人武氏乃刑部廣西清吏司員外郎栗魁周之母柔靜宜家惠溫若性篤生令子訓迪于成用亢厥宗聲華播美相維爾慶再聞褒綸茲加贈爾為宜人象服申頒堂封增煥

刑部福建司員外郎劉得寬二道

制曰士制百姓于刑之中以隸民彛非徒以威之也故國家崇重司寇之任盛備厥屬而必審擇惟良以共厥理期用中于祥刑焉耳爾刑部福建清吏司員外郎劉

得寬發身甲第試政采邦冬日流暉人見其可愛春和
布令民自以不寃迺陟秋曹俾贊邦禁而爾能永懷敬
忌不剛不柔審克用中以佐從欲之洎厥績懋焉茲朕
纘服覃恩特用進爾階奉直大夫錫之誥命嗚呼掌憲
民之司命也不以內外異爾既以平恕有聞于內矣朕
復擢爾外臬冀弘爾用爾尚益堅乃志永迪民于中哉
制曰婦有相夫之義故國家之錫命有從爵之典所以
廣恩施勸婦順也是惟彝制何間存亡爾謝氏乃刑部
福建清吏司員外郎劉得寬之妻夙閑內訓作配吉人
淑德孔多降年不永有家方競音徽已遐追悼昔勞可

無恩卹茲贈爾為宜人幽室有靈服此褒寵

制曰古者四命為大夫授以祭品風有采蘋則大夫妻相祭之詩耳今我廷臣有登大夫列者其妻當與共承祭祀矣茲命數宜同也爾常氏乃刑部福建清吏司員外郎劉得寬之繼妻順正無違勉修孝敬克相夫子荐陟顯庸閭德既章宜膺寵命茲封爾為宜人茂承象服之華益謹惟筐之職

其二

制曰父以教忠為賢子以顯親為孝故國家錫慶臣工而必推恩所自者匪特遂其欲報之心抑亦表其式穀

之訓耳爾劉斌乃刑部福建清吏司員外郎劉得寬之
父剛直無私謙恭中度潛德弗耀義訓有方積厚流光
延祉于後肆惟令子為我憲臣顧詩禮之教雖彰而鼎
釜之養不逮宜頒貤典加賁重泉茲特贈爾為奉直大
夫刑部福建清吏司員外郎用昭餘慶之垂以慰罔極
之慕

制曰父母之與子其鞠育之德誨迪之恩均也故國家
加惠臣下必併逮其父母焉豈非緣人情而為之節大
哉爾張氏廼刑部福建清吏司員外郎劉得寬之母勤
慎有儀儼素自性相尖以順愛子知勞亦既霑夫祿養

矣綸綍方來風木不待有足悼者茲特贈爾為宜人尚服湛恩永綏祚胤

禮科左給事中王治二道

勅曰朕寅紹寶曆丕覃閭澤自卿士庶尹以及六軍萬姓有大賚焉矧惟侍從獻納之臣出入省闈備宣翊戴之勤俾補闕遺方賴糾繩之益而推恩顧可後與爾禮科左給事中王治清心亮直沉慮精詳甲第奮身使軺著節迨陟司言之署益彰許國之忠通達舊章議論持其大體曉暢時事出入告以嘉謀朕方作新于化機冀爾敷陳其諫論特用授爾階徵仕郎錫之勅命嗚呼宮

之奇不能強諫議者譏其失當臧僖伯不忘匡君識者
知其有後惟爾謇諤勿替始終蹈古今彛對揚休命欽
哉

勅曰士必宜于家者有鷄鳴靜好之助然後在位著羔
羊委蛇之節臣共之資于婦順尚矣苟或中道仳離于
人情能無隱乎爾禮科左給事中王治妻張氏女行純
全閭政修舉爾夫之篤學守官懋有成績者寔爾相之
亦既同心胡不偕老念惟徃勸宜有追褒特贈爾為孺
人渙渥申頒英魂是憫

其二

勅曰士有豐于德而嗇于年約于生前而泰于身後者
豈惟屈伸相承數有固然抑亦德福感召理有不偶耳
爾王鑑乃禮科左給事中治之父抱道在躬式穀于子
雖當年賁志不獲試其遠猷而厥後克昌竟丕彰其義
訓睦此敢言之節寔惟篤行之貽不有貤恩曷昭餘慶
茲特贈爾為徵仕郎禮科左給事中歆茲有赫之恩慰
爾未成之志

勅曰婦以克成夫志為烈母以能立子名為賢蓋自圖
史所載兼是二者尠矣爾檀氏乃禮科左給事中王治
之母盛年守義白首不渝一意字孤冀延夫緒是興哲

胤為吾諍臣克懋令猷寔惟慈訓婦儀母道可謂兼善
矣茲特封爾為太孺人茂膺冠帔之華丕介康寧之祐

工科左給事中朱繪二道

勅曰化理之要責在諍臣職任所宜厥惟正士我國家
竝建六科冀康庶事委寄斯重遴選惟艱爾工科左給
事中朱繪乃前都察院右僉都御史方之子家學淑芳
賢科拔雋初試圻邑吏民稱曰廉平簡陟瑣闥朝著推
其謇諤比因請告閱歷歲時先帝追念其忠勤天下想
聞其風采召從家食俾復禁聯屬于新政之方殷眷爾
舊德之是訪爰循彝典既溥被于明恩載閱闕書吏兼

旌于晁課是用進爾階徵仕卽錫之勅命嗚呼爾居諫署十有五年餘矣而資歷方及一考恬節自持既有徵於已往嘉言罔伏尚虛佇於將來勉蹈厥猷弼予于治欽哉

勅曰婦之于夫也有齊體之義故國家錫命臣工亦有從爵之典人道攸重存歿同之爾工科左給事中朱繪妻周氏毓粹德門夙閑內訓作嬪令族式備婦儀夫宦方達爾年不永有足悼者茲特贈爾為孀人幽壤有知歆斯寵貴

勅曰臣有匡君之貴婦有從夫之義故人臣能盡匡救

不懈之忠則其室家儆戒相成之益可徵已爾工科左給事中朱繪繼室趙氏溫惠提身克持內則相夫從宦蔚有休聞慶祉方延中道而逝言念夙勤宜有褒嘉茲特贈爾為孺人眷惟未泯之淑靈服此厚終之恩渥

其二

勅曰夫臣輸忠于國不獨自致其身已也且教忠于家俾其子孫世守焉故生有崇名歿有顯號或時經晦阨積久必復茲乃天道焉耳咨爾原任都察院右僉都御史朱方乃工科左給事中繪之父壯猷直道著績光朝餘慶義方貽休後嗣雖以忠獲罪心罔白于當年而因

子陳情義竟伸于今日既還峻職嘉乃舊勞載進崇階
渙予新渥是用贈爾為中憲大夫錫之誥命嗚呼忠貞
世篤爾克衍其家聲綸綍重頒朕用懋夫國典是惟命
德用勸群工

勅曰女德不出閭閻然夫有令儀可以徵婦道子而克
肖可以占母儀古之烈女率以是有聞焉爾封孺人董
氏乃原任都察院右僉都御史朱方之妻工科左給事
中朱繪之母以順正相夫以慈惠訓子象服有煒顯被
于生前驚誥重光游頒于身後可謂榮也已茲特贈爾
為恭人尚承再命之恩用慰百年之慕

禮科給事中張鹵二道

勅曰我國家並建六科列在禁近是為侍從耳目之司以朝夕承弼厥辟規諫諷諭俾鮮違失任至隆也朕方訪落深惟繼序之愆夙夜兢兢亦惟是左右直諒之臣是咨是度期登于理委寄斯重褒賚宜先爾禮科給事中張鹵經學承家儒術飭吏賢科奮跡劇邑馳聲是登七諍之班用達四聰之聽而爾清標直節正色宏詞嘉績多于先朝忠藎孚于予志茲覃踐祚之恩特授爾階徵仕郎錫之勅命嗚呼皇極錫之福朕方弘新命之圖左右惟其人爾勿替責難之敬所期謹論上副虛懷俾

予初改堯光紹列祖之洪休固有闕遺則朕以懌欽哉
勅曰夫貴于朝妻榮于室此典禮之大經也然或黽勉
同心于處約之時而不獲共其亨泰則人情有深隱矣
是以推恩之制必追逮焉爾禮科給事中張鹵妻劉氏
夙奉姆儀明章婦順事姑克殫其孝敬相夫交致其儉
勤夫宦方成爾年不待念惟徃勤宜有襍章茲特贈爾
為孺人尚期永泯之淑靈歆此維新之寵渥

勅曰朝夕納誨以輔君德者蓋臣之猷也夙夜儆戒以
成夫志者淑媛之行也故推恩于臣而併及其室非獨
示以敢言之利抑且昭其同德之光耳爾禮科給事中

張鹵繼室郭氏淑慎自持惠溫若性克相夫子為時聞人建白孔多著聲省闈爾之內助足徵已茲特封爾為孺人尚服便蕃之寵益敦靜好之風

其二

勅曰士君子有潛心績學而不究其施飭躬蹈德而不享其報則其未遂之志有餘之慶必于厥後昌之此天道也爾張立乃光祿寺卿原明之子禮科給事中鹵之父孝友有聞恬靜無欲究性命之奧旨遠有師承繹父象之微言世其家學已與明廷之賦竟逃空谷之名蓋終身未釋乎布韋乃有子能傳其弓冶睠茲省闈綽有

直聲爰遡庭闈足徵嚴訓特用贈爾為徵仕郎禮科給事中恩綽申頌泉臺增貴

勅曰式穀而以義方者賢母所以成子承顏而以祿養者孝子所以悅親是以易著嚴君詩頌壽母人情所願今古同之爾雷氏乃戶部主事啓東之女禮科給事中張鹵之母既明且哲寶儉與慈閑圖史之令儀備言容之淑範相夫從學而德音不違教子成名而官箴申誠宜申國典章此壺彝特封爾為太孺人渙綸孔赫顯被乎明恩鼎食方隆永綏于介福

刑科給事中曹當勉二道

勅曰朕寅奉丕圖思弘至理顧茲改化否臧之寄厥惟
左右耳目之臣方虛佇于讜言用懋推夫褒典爾刑科
給事中曹當勉器朗以閎才周且練蚤承家學振藻于
賢科迨服官常馳聲于使職是用升華瑣闥贊治黃樞
而爾能罄有犯之嘉猷奮不回之勁節俾予一人罔有
闕遺時維乃績茲進爾階徵仕卽錫之勅命嗚呼官惟
其人朕甚重諍臣之選言必有中爾宜紆匡辟之忠苟
有利于國家慎無忘于獻替克永終譽則予爾嘉欽哉
勅曰臣之事君也有左右匡掇之責婦之承夫也亦有
夙夜儆戒之道故朝廷錫命臣工而必併逮厥配焉所

以獎臣忠章婦順也爾刑科給事中曹當勉妻王氏溫
惠裋躬儉勤治內恪相夫子敬爾有官譽問宣昭足徵
內助茲特贈爾為孺人尚益敦順正之風丕介委佗之
祉

其二

勅曰士有宏負而不究其用則其衍慶也必長厚積而
不享其成則其食報也滋遠豈惟否泰乘除之定數益
亦德福感應之常經是擣恩褒用彰潛懿爾曹遷乃刑
科給事中當勉之父德重鄉評有長者之譽學臻堂奧
履幽人之貞雖當年竟鬱其聲光而身後克揚其餘澤

嗟惟哲嗣作朕直臣服教忠之義方若于汝訓著移孝
之大節孚于予聰茲特贈爾為徵仕郎刑科給事中嗚
呼再世而昌焯矣一經之詒九原可作承茲初命之榮
勅曰愛之能勞賢母所以成子養而不逮孝子所以思
親故國有典章母以子貴渙恩崇號靡間存亡爾余氏
乃刑科給事中曹當勉之母孝敬有聞言容不苟相夫
篤學俾無顧內之憂誨子克家濬發光前之慶追惟慈
訓宜有褒綸茲贈爾為孺人尚歆象服之華永慰梧棊
之慕

監察御史蔡應揚二道

勅曰御史臺綱紀群司糾繩庶吏而朝政有關亦得抗
言蓋法從之清秩憲府之要樞朕甚重焉嗣服之初方
褒叙勩勞覃及有位而于臺臣可後耶爾雲南道監察
御史蔡應揚材資敏達志行潔修筮仕外庠再長劇邑
踐敷政教蔚有休聲及采自輿評擢司邦直復能練明
政體崇秉風裁間有激揚多闕大計可謂能其職者已
茲特授爾階文林郎錫之勅命夫惟有強毅不阿之氣
然後可以儆官邪惟有好惡不作之心然後可以明國
是惟有通朗不滯之才然後可以條世務御史之職重
矣尚懋爾官無忝朕命

勅曰婦職不過閨內爾乃國家錫命于臣必併榮其配者蓋以齊體之分隆風教之端重也爾李氏乃雲南道監察御史蔡應揚之妻閨儀備飭壺政恪宣儆戒相成險詖無謁爾夫之策勛陟要爾亦與有裨焉茲特封爾為孺人祇承翟服之恩式播鷄鳴之德

其二

勅曰士固有潛修約處弗顯于躬而貽穀垂休克昌厥後者天之道也王制奉天道者也故錄于之賢而父亦及焉爾蔡珩乃雲南道監察御史應揚之父行重鄉閭迹甘泉壑克正義方之範聿成哲胤之名宣力皇家朕

所嘉悅匪爾之德其疇成之茲特贈爾為文林郎雲南
道監察御史願雖違于鼎養恩已被乎綸褒尚期不昧
之靈歆此有赫之命

勅曰禮重嫡母明有尊也矧其弘樛木之仁而啓螽斯
之慶則為子者可無報乎爾夏氏乃雲南道監察御史
蔡應揚之嫡母淑慎裋身惠和逮下化宣雍穆祚衍繩
詵惟賢嗣之能官皆慈幃之有訓茲特贈爾為孺人服
我恩光慰爾冥漠

勅曰母之成厥子也如古所載斷織和丸之事詳矣然
非其子之有聞則劬勞亦無因而見焉爾程氏乃雲南

道監察御史蔡應揚之生母性惟溫惠心木塞淵篤生
令人慈而能誨果致策名之美兼誇逮養之榮茲持封
爾為太孺人茂介修齡永綏繁祉

監察御史劉思問二道

勅曰我國家以紀綱為治故于御史之任特隆內之巨
救愆違抨彈邪枉外之糾察郡國宣導民情舉以屬之
而考其成焉克稱其任者難矣爾湖廣道監察御史劉
思問直道不阿清操自勵兩推郡獄有平反之稱洊陟
內臺播公方之譽比持使節按部滇南和洽民夷風遠
清于萬里疏陳利弊政丕變于期年朕念諸臣將事之

勞俾均三載考績之典而所司以爾最課來奏朕甚嘉之是用進爾階文林郎錫之勅命嗚呼朕初嗣大曆求治方殷茲欲使廢墜聿興幽遠必達緊惟我左右耳目之臣是賴爾其益殫忠藎勿替初猷用副朕稽衆詢謀之意欽哉

勅曰夫婦有齊體之義則貴賤同之故國家寵命臣工必及厥配不以存亡而有間焉禮也爾湖廣道監察御史劉思問妻牛氏孝敬惠和克章婦順方宜其室不永于年夫既顯榮宜從厥貴茲特贈為孺人九原有知歆斯恩貴

勅曰人臣能盡夙夜在公之節而忘內顧豈獨其人之
賢哉亦必有內助焉此䟽榮之典所由加也爾湖廣道
監察御史劉思問繼妻連氏恪脩壺政作配吉人為國
諍臣蔚有時望爾之順正足徵己茲特封爾為孺人尚
敦儆戒之風益迓便蕃之祉

其二

勅曰忠孝一道也人臣能盡忠于君則其思致孝于親
也必篤是以國家敷錫臣工之典親雖亡必追及焉所
以懟孝思以勸忠焉耳爾劉武乃湖廣道監察御史思
問之父好施有聞樂善不倦與物無競閭閻稱為善人

愛子能勞詩書衍其義訓肆惟家嗣振譽中臺宜有追
褒以彰餘慶茲特贈爾為文林郎湖廣道監察御史祇
服恩綸永綏廟祐

勅曰士有膺祿位之榮而不逮父母之養者則雖升華
躋要其蓼莪之感必深矣不有思褒曷紆孝慕爾張氏
乃湖廣道監察御史劉思問之母孝敬惇于事姑慈明
章于教子婦儀母德作範中閨鼎養方未墓木已拱有
足憫者茲特贈爾為孺人丕覃寬宥之光用慰枯槁之
痛

監察御史羅鳳翔二道

勅曰朕嗣承大曆思弘化理振紀綱以釐庶務隆恩施
以和百工嘉與天下更始睦惟臺察之臣正司中外紀
綱之寄者是以褒寵必先焉爾湖廣道監察御史羅鳳
翔有通敏之識負剛大之氣賢閔敷教經生推其博聞
憲府頒條法吏服其直道越有玉績著在中臺肆惟大
賚之恩用舉疇庸之典茲授爾階文林郎錫之勅命爾
尚益殫嘉猷翼予新政垂紳正色內輸謇諤之忠攬轡
觀風外聞激揚之烈嗣有顯陟答爾成功欽哉

勅曰夫婦齊體則貴賤同之其有勤瘁相成于家食之
時而不獲共其寵貴者此固人情所深隱也是以國家

疏榮之典必追逮焉爾湖廣道監察御史羅鳳翔妻王氏育芳名閼儼德哲人淑慎有儀宜其家室夫方陟崇臚之仕爾乃違偕老之歡非有卹綸曷疇徃勤茲特贈爾為孺人幽靈不昧服此明恩

勅曰邦紀之振厥有賴于諍臣間改之肅亦惟資于哲媛故疏恩于國而必併逮其室焉所以隆風教也爾湖廣道監察御史羅鳳翔繼室王氏敬戒無違式和內範克相夫子馳譽中臺茲頒踐祚之恩是舉從榮之典特封爾為孺人尚膺冠帔之華益謹衿幘之訓

其二

勅曰子能仕而父教之忠則臣任職者君當勸以孝故
國家錫命臣工而必推恩所自者所以章顯義方為天
下之父子勸也爾羅九疇乃湖廣道監察御史鳳翔之
父谿達能仁敦篤無偽信義之譽見重于鄉詩書之澤
克昌厥後相維令子作朕直臣念庭訓之遠揚宜國恩
之追賁茲特贈爾為文林郎湖廣道監察御史茂溥明
綸增暉禰廟

勅曰母以子貴禮有常典欲養而親不逮則孝子之心
戚矣故國有追褒之義因以慰孝思于不匱耳爾王氏
乃湖廣道監察御史羅鳳翔之母勤儉相夫既大競于

有室式穀訓子復顯亢于厥宗顧鼎金之養方來而風
木之悲不待有足悼者茲贈爾為孺人匪惟增泉壤之
光且以慰栢捲之慕

監察御史成守節二道

勅曰國家分職庶務官守言責各有司存若夫君德朝
政官治民隱在內得以言之在外得以行之惟御史之
職則然厥任可謂艱且重矣爾四川道監察御史成守
節發身賢科試政劇邑茂質惠政卓有令聞擢任中臺
宣揚憲度謀無不當績遠播于安邊知無不言忠深勤
于劇上方爾歲勞之奏正予訪蒞之初爰降褒綸用旌

直道特進爾階文林郎錫之勅命嗚呼我國家久安長
久所以吏奉法民安業者厥惟紀綱是賴修明振飭俾
萬世無斁則亦唯是司法之臣致之爾尚勿替令猷用
贊我維新之治欽哉

勅曰御史歲奉明命巡省郡國義不復顧其私蓋風紀
攸存視諸司有間矣不有淑哲之媛曷能任厥間政以
免內恤哉爾四川道監察御史成守節妻封孺人張氏
夙閑姆訓儼德吉人并曰躬勤孝養有資于志學布荆
守儉清操克相于居官邑政告成已頒顯命憲伐申奏
載錫榮章仍封爾為孺人尚敦靜好之風服此便蕃之

寵

其二

勅曰君子抱道積德于身而不食其報則其未究之志
有餘之慶必乎厥後昌之故國家錫命臣工而必推本
所自禮也爾贈文林郎直隸真定府元氏縣知縣成良
鄉乃四川道監察御史守節之父孝弟有聞質直無偽
飭躬以道見重于鄉閭教子成名飛聲于朝著閱書來
上勞勩孔多其爾之休宜承嘉命茲加贈爾為文林郎
四川道監察御史尚歆再命之榮永作九京之賁
勅曰劬勞罔極父母之恩同也是以人子明發有懷欲

報之情不異焉國家追崇之典而必併及者謂非緣情以盡制與爾贈孺人國氏乃四川道監察御史成守節之母順以相夫仁能逮下處閭而知重清議教子而克成令名雖栝樅之永違而綸綍之申錫亦足慰已茲仍贈爾為孺人加貴宗祔錫祉嗣胤

監察御史王友賢二道

勅曰朕嗣承大曆思以振紀宣風作新化理貞肅重寄唯是臺察之臣任之明恩所溥敷錫固所先也爾湖廣道監察御史王友賢行已有經立心不貳賢科發跡宰邑馳聲追陟中臺尤多茂績刺姦京國共傳且止之謠

視旅東郊條上于襄之略屬予訪蒞嘉爾勤勞是用進
爾階文林郎錫之勅命嗚呼朕虛已而佇讜言民引領
以觀新政爾尚出宣明憲入告嘉猷俾王度於昭衮職
無闕勿替朕之休命哉

勅曰朝廷以紀綱治天下而夫婦紀綱首也是以彝憲
重之恩錫百工則必併及伉儷存亡奚間焉爾湖廣道
監察御史王友賢妻梁氏夙秉惠和閑于內訓方宜厥
室不永于年夫今顯榮爾逝已久宜有褒卹用旌曩勞
茲贈爾為孺人重泉有知歆斯顯寵

勅曰御史奉命察郡國吏治歲乘軺車四方盍不遑顧

厥家也不有淑媛曷能免內恤哉爾湖廣道監察御史
王友賢繼妻梁氏淑慎有儀順正罔怠克相夫子光顯
于時睦茲出入匪懈之忠寔賴儆戒相成之助永言懿
則宜有渥恩茲封爾為孺人尚服綸褒益虔內理

其二

勅曰忠孝一道也故求忠臣者則于孝子之門國家褒
錄臣忠而必貤恩所自亦所以慰孝思而推其欲報之
願耳爾王用乃湖廣道監察御史友賢之父貞素持身
坦夷接物蓄德維厚不享于身貽慶則長克昌厥後肆
惟哲嗣為朕諍臣眷臣道之不阿知義方之能誨茲特

贈爾為文林郎湖廣道監察御史渙播治朝之命崇增
禰廟之暉

勅曰國家稽古定制妻從夫爵母以子貴存有顯渥歿
有追榮其辨分立法緣情起義禮至周也爾張氏乃湖
廣道監察御史王友賢之嫡母順以宜家仁能逮下導
和衍慶施及嗣人振采蜚英殿宗用亢宜有褒寵章爾
潛休茲特贈爾為孺人幽壤推恩中閨作範

勅曰劬勞顧復父母之恩同罔極也是以國有貤典而
必推及其所生益以錫類不匱體人子之至情耳爾田
氏乃湖廣道監察御史王友賢之生母履順不淪含章

可貞輯和有家垂裕于後顧鼎金之養方至而風水之
願永違有足悲者茲特贈爾為孺人匪惟慰明發之有
懷抑以彰福善之不爽

禮部主事舒應龍二道

勅曰主客部掌以賓禮待四夷之朝貢凡郊勞授館宴
設賜予辨其等而以式頒之非蘊致深邃練累朝之舊
章字量宏通諳遠人之情狀者不足稱是任也爾禮部
主客清吏司主事舒應龍以穎俊之資秉詩禮之訓奮
身甲第出宰海邦多士讓其先登百姓懷其厚道游騰
英譽擢任清曹而爾能從政有經博文不怠典屬國之

庶務各中法程獵藝苑之群芳悉歸條貫懿惟士彥允
謂邦楨茲推踐祚之恩是舉褒賢之典特授爾階承德
郎錫之勅命夫更化之初四方遠夷正面內而觀聲教
時也朕無敢怠荒方致隆于慎德至于宣達國家威寵
以和輯異類賓四門而觀聽美焉匪爾其孰與屬之尚
紆蘭署之籌穆我藁街之政

勅曰遠人來格固徵王道之成內政克修寔端風化之
始睠我司賓之佐越有婉德之賢令聞於昭褒綸可後
爾禮部主客清吏司主事舒應龍妻蔣氏毓貞名族儼
美吉人克持淑儀輔成令德蚤騰英茂游歷清華邦有

寵章爾宜從爵茲特封爾為安人顯膺冠帔之榮用報
珩璜之贈

其二

勅曰君子抱道在躬式穀于後雖其身不獲試利濟之
猷迺于其子竟享顯揚之報亦足為績學篤行之士勸
矣爾舒烈迺福建寧德縣知縣文奎之子禮部主客清
吏司主事應龍之父孝友有聞端方不撓紹專門之家
學匱玉未沽衍趨庭之義方簾金載遺肆惟才子為我
望卽出陳力而亮工入承顏而養志睠此有餘之慶宜
承不次之恩茲特封爾為承德郎禮部主客清吏司主

事其畢爾素志篤於教忠避筭方延渥恩未艾

勅曰賢母之子子匪獨鞠育顧復所以愛之者殷也其
提携導諭俾幼成之若性者又必有慈訓焉故論母德
者恆于其子徵之爾袁氏乃禮部主客清吏司主事舒
應龍之母治內儉勤裋身淑慎相夫篤學而敬之如賓
教子成名而臨之若傳既懋膺夫祿養宜顯被于渙恩
茲特封爾為安人承初命之榮暉保百年之具慶

刑部主事鍾穀二道

勅曰刑官上執天憲下司民命厥任亦甚重矣故非有
精明之才仁恕之心者不足以輕授爾刑部湖廣清吏

司主事鍾穀奮跡制科拜官省闥卽膺鈔簡俾贊秋曹
乃能折獄惟良明刑克允平反論蔽具見勤能蓋所謂
以儒飾吏者朕甚嘉之爰當慶典之頒不俟年資之及
特授爾階承德郎錫之勅命朕新政之初方思與二三
法臣察寃詢瘼共成祥刑以培餘氣爾惟益矢乃職稱
朕敬忌之意欽哉

勅曰化始家人禮資宗婦益自昔重之故朕之褒錄群
臣亦必揚其內德焉爾顧氏乃刑部湖廣清吏司主事
鍾穀之妻婉淑端莊夙閑壺則相厥夫子順正無違既
有婉美之賢宜錫偕榮之典茲封爾為安人益保徽音

副此恩命

其二

勅曰夫人臣之策勛清時勤宣義問將以膺王朝之寵而藉為父母榮也不褒大而顯揚之其何以示勸乎爾鍾祥廼刑部湖廣清吏司主事穀之父少涉詩書長修行誼冥棲高蹈以適厥身顧深詒穀之謀能切教忠之訓子既有立爾亦有聞奎養方來溘焉先逝良可惻已茲特贈爾為承德郎刑部湖廣清吏司主事尚服恩綸以慰幽窆

勅曰史稱雋不疑之母以多所平反為喜而不疑奉其

教持法遂平然則母之教亦重矣此國家所由錄也爾
張氏乃刑部湖廣清吏司主事鍾穀之母婦順夙章母
儀尤飭勤誨爾子克成令人弼我祥刑本于慈訓宜慶
恩之敷錫章天道之寵綏茲特封爾為太安人既佩榮
光永綿壽祉

刑部主事游日章二道

勅曰昔舜當摠師之初即加意典刑首下欽恤之令聖
人之重民命若此乃文王罔敢知庶獄則惟準人之知
恤是圖蓋其慎所寄哉朕方弘在宥之理評讞詳覆亦
惟我司寇諸士職是敬忌越有慶賚用丕覃之爾刑部

廣東清吏司主事游日章識慮精詳字度周慎發身甲
第報政劇邦行已有恒臨文無害是用擢居憲部俾贊
刑書而爾果口無擇言舉無過事五辭師聽盡審克之
方三典是叅致惻成之慎民用不犯時乃之休茲授爾
階承德郎錫之勅命嗚呼五刑之麗寔惟天時予曰辟
爾勿辟予曰宥爾勿宥具嚴天威毋輕民命庶幾洽朕
好生之德俾天下無冤予則顯陟汝欽哉

勅曰士君子能執法不阿以佐王刑邦國者其修身閑
家蓋必有刑于之令範焉不有以褒錫之奚以彰其紀
綱之首乎爾刑部廣東清吏司主事游日章妻陳氏蚤

奉姆訓休有女儀德音不違克相夫子績學從宦著有
令聞爾之婦道足徵已茲封爾為安人既顯膺從爵之
榮其益懋同心之助

其二

勅曰君子之教子也恒道以事君之義故國家之使臣
也每體其顯親之心禮有常經朕用大賚爾游德盛乃
刑部廣東清吏司主事日章之父孝友之行見重于鄉
評詩書之澤克衍其義訓是成賢子典朕祥刑睦平反
之不苟知陰隲之有自茲特贈爾為承德郎刑部廣東
清吏司主事頒慶明廷渙布絲綸之命賁恩幽宥永延

松檟之暉

勅曰詩歌燕喜必以壽母言之蓋劬勞鞠育孝子欲報之心罔極此其所深願者故長言之咏嘆之也爾洪氏乃刑部廣東清吏司主事游日章之母靜正不愆于儀儉素能安于性承姑以順教子惟嚴肆哲胤聯薦于賢書乃慈壽茂膺夫祿養茲朕方弘孝理用錫殊恩特封爾為太安人寵綍親承中壺作範

山東螯山衛經歷秦應鉞二道

勅曰益聞實不遺遠則有功者勸故國家考績之典無論內外悉以九載定殿最功勤果著則恩錫必加焉可

以勵百工也爾山東螯山衛經歷司經歷秦應鉞佐戎
海澨積有賢勞歲資既深第課登最茲特授爾階徵仕
郎錫之勅命爾其益暨乃心恪共職事以求無負茲彙
典哉

勅曰凡中外之吏雖崇卑殊科其能效勤于公則必有
交儆于中壺者故褒典必併及焉不以存歿間也爾唐
氏廼山東螯山衛經歷司經歷秦應鉞之妻相夫宜家
服有官守而得年不永弗共厥榮有足憫者茲贈爾為
孺人幽壤有知歆斯寵賁

勅曰夫婦有齊體之義是以朝廷褒錄臣工之賢而必

逮厥室焉蓋緣情定制所以體臣者至周也爾唐氏廼山東螯山衛經歷司經歷秦應鉞之繼妻勤儉相夫俾無內顧輸勞于國惟爾之休茲封爾為孺人尚服明恩益共壺職

其二

勅曰人臣能孝于其親然後能忠于所職故國家錄勤錫命必推恩以逮及其親焉所以教孝而勸忠也爾秦文爵廼山東螯山衛經歷司經歷應鉞之父居貞不耀教子有方任職稱賢惟爾遺慶茲贈爾為徵仕郎山東螯山衛經歷司經歷靈爽如存歆茲明命

勅曰臣子驅馳王事至不遑將母國家錄其勞體其情
則褒綸之錫必推及其所恃焉禮也爾陳氏乃山東
山衛經歷司經歷秦應鉞之母履和毓順施于厥嗣宣
勞于位慈訓用彰茲贈爾為孺人服此明綸永祚爾後